



*Iesus estime plus le petit don de la pauvre vefue, que les dons des riches, & puis il predict la ruine du Temple.*

**OMME** Iesus regardoit les offrandes qu'on mettoit dans le tronc qui estoit au Temple, il vid les riches qui y mettoient leurs dons largement. Il vid aussi vne pauvre vefue qui y mit deux pites. Adonc Iesus dist à ses Disciples, Vrayement ie vous dis que cette pauvre vefue a plus mis que les autres ; car tous ceux-cy ont mis aux offrandes de Dieu de ce qui leur abonde : Mais cette-cy a mis de sa pauvreté, & tout le viure qu'elle auoit. Et comme quelques-vns disoient du Temple, qu'il estoit orné de belles pieres, il dist, Est-ce cela que vous regardez ? les iours viendront auxquels ne sera laissée pierre sur pierre qui ne soit démolie. Adonc ils l'interrogerent, disans ; Maistre, quand sera-ce donc ? & quel signe y aura-t'il quand cela aduiendra ? Et il dist, Regardez que ne soyez seduits, car plusieurs viendront en mon nom, disans ; C'est moy qui suis le Christ. Le temps approche, n'allez point apres eux. Et quand vous aurez des guerres ou seditons, ne vous épouventez point : car il faut que ces choses aduiennent premierement, mais la fin ne sera pas si tost. Et il leur disoit d'abondant, Les Nations s'elueveront contre les Nations : grands tremblemens de terre seront, & famine, & pestilence, & épouuamment, & y aura de grands signes au Ciel ; mais auant toutes ces choses vous serez liurez deuant les Sinagogues & les Rois, & souffrirez beaucoup de maux pour mon nom.

*S. Matthieu Chap. 24. S. Marc Chap. 12. & 13. S. Luc Chap. 21.*